

Das ein vnd fünffzigste Capitel.

Wie ein Jäger den Hirsch auffsuchen vnd
Behunden sol.



Nach dem alle sachen wol erkündiget / vnnnd der Standt darinnen
der Hirsch verbroch vnnnd bestetiget / gewis ist / die Jäger auch mit ihren Hunden
den Druck vnd anders zu sich genommen / sol derjenige so den ältesten Hirsch
bestetiget / sein Leidhund an die Hand nehmen / vnd mit seinen Mitjägern vnnnd
Gefellen sampt allen iren andern Jaghunden gen Holz auff die Fahrt ziehen /
Es sol ein jeder ein fein steiffe gerade Spisbruth / damit die Rast von Bäumen
abzuwenden / oder in die Hecken damit zuschlagen / in der Hand haben / Wenn sie denn nun zu den
gelegten Brüchen auff die Fahrt kommen / sollen sie dieselbigen / den Hirsch zuerkennen / wol abse-
hen / auch sonst auff andere Merckzeichen gut achtung haben / So denn die Jaghund allesampt
für dem Bruch bey einander seyn / sollen sich auch alle Jäger zu hauff geschwindt vmb den Standt
dader Hirsch bestetiget / sein Haar vnd Gehörn zuerkennen / ringsweiß auftheilen / vnd der Jäger so
in bestetiget / sich allein vnder vnnnd vor ihnen allen herfür thun / vnnnd den Hirsch auffsuchen / sintes
mal ihm allein dieselbige Ehr billich zustehet / Die andern nach ihm sollen also schreyen / Da laufft
der Hirsch hinauff / da laufft er hinauff. Es sein aber die zwey ding zumercken / Erstlich sollen die
Jäger ihre Hund auff der Fahrt nicht so hefftig erhitzen / damit sie nicht etwa dieselbige verlieren /
vnd in abfall kommen möchten / Die andern Jaghund zuhauff / sollen darnach auch eben demselbis-
gen Weg vnd Besuch / welchen der Hirsch vñ Leidhund genommen / nachfolgen / sie sollen sich aber
weder zu den Jägern noch Leidhunden / vnder sechzig schrit lang nahen / damit sie nicht etwa wo der
Hirsch in seinem Standt ein tück oder list erdacht solte haben / den Weg vnd Fahrt vertretten / vnd
die Leidhund also darauff dieselbige widerumb zusuchen vnd zufinden nicht gelegenheit hette. Denn
die böse tückische arglistige Hirsch gemeinlich diesen bösen brauch an in haben / daß sie nemlich / so
offt sie in iren Standt zur ruhe ziehen / so offt auch ein besondern Tuck vnd Widergang zu gebrau-
chen gewohnet seyn / Vnd wo denn die andern Jaghund samplich den Leidhunden zu nahe weren /
zerbrechen vnd zerreißen sie die Weg vnd Fahrt / daran der Jäger nachmals dieselbige vorige rich-
tigkeit zubringen / genugsam zuthun haben würde. Wo sichs auch zutrüge / daß der Leidhund im
suchen des rechten Wegs vnd der Fahrt verschlete / sol ihn der Jäger widerumb zurück ziehen / vnd
also sagen / Schon lieber Hund schon / etc. Vnd wenn der Hund widerumb auff die rechte Fahrt
kommen / sol der Jäger dieselbige anschawen / vnnnd darauff allerley Merckzeichen / ob es der vorige
Hirsch sey / wol abnehmen / befindet er / daß er auff rechter Fahrt / sol er vberlaut also schreyen / Da
kompt er her / schaw da kompt er her / der Edel Hirsch kompt daher / schaw daher / da kompt er her / du
hast recht / trawter Hund du hast recht / du hast recht mein Knecht / du hast recht / Er sol auch ein
D D D Bruch

D D D

Bruch